



新刻姓源珠璣卷之五

江陰楊信民編輯

○十五馬

馬扶風羽音羸姓伯益之後趙王子趙奢爲馬服君
因氏

馬融字季長才高博學諸生千數盧綰鄭玄其徒
也坐高堂施絳帳前授生徒後列女樂漢永初
中拜校書郎

馬公亮少時夜閱書忽有大手如扇自窓入亮以
雌黃水大書草字窓外大呼曰速與我滌去不

然禍及汝亮不聽而臥將曉哀告手不能縮且
曰公將大貴我戲犯公何忍致極地公獨不見
然犀之事乎亮悟以水滌之遜謝而去

怪異錄

馬郎婦菩薩也憫陝右人不屬化乃爲美婦賣魚
姿貌風韵人求爲姻曰我亦欲有歸不用聘禮
但一夕能誦普門品者事之至明誦者二十輩
曰女子一身豈配衆等可誦金剛經至日通者
猶十數更授法華經三日通者至期獨馬氏令
具禮成婚迎之至家婦曰適體不佳少安相見
客未散而婦歿已壞爛葬之數日有老僧來問

所由引至葬所僧以錫撥塚尸已化唯金鎖骨
在焉僧以骨挑錫上謂曰此聖者憫汝等障重
故垂方便宜思善因忽飛空而去泉州榮和尚
贊云丰姿窈窕鬢歌斜賺盡郎君念法華一把
骨挑去後不知明月落誰家

釋氏通鑑

馬周少時袁天綱見之曰伏犀貫腦背若有負責
相也

微時因李淳風言京師賣餅婦大貴遂娶之婦
乃引至常何家唐貞觀入關中舍新豐客邸命
酒一斗八升悠然獨酌

舍中郎將常何家為條便宜二十餘事帝怪武人安能此問之以周對召見大悅拜監察御史

至中書令

通鑑

馬援漢末屬隗囂使觀公孫述曰子陽井底蛙耳使謁光武曰當今世非獨君擇臣臣亦擇君矣今見陛下乃知帝王自有真也 建武間交阯女子徵側徵貳反上以援為伏波將軍討之斬側貳立銅柱為漢之極界 征武陵蠻上愍其老援上馬據鞍顧盼上笑曰矍鑠哉此翁是行卒 先克交阯還餌薏苡仁載歸卒後有譖以

文犀明珠子孫上書乃解

通鑑

女為明帝后德冠後宮崩謚明德

馬會元唐元和中遷安南都護建二銅柱於漢故

處鏡著唐德以表伏波之裔

唐書

馬良字季常兄弟五人皆有才名良眉中有白毫號白眉先生辟為荊州從事

馬廷鸞宋咸淳中與江古心同相

賈武威商音唐叔虞少子公明康王封於賈以國為氏

賈至字幼憐唐玄宗知制誥初睿宗傳位父曾艸

詔玄宗至州詔帝曰兩朝盛典出卿家父子可謂能繼美矣

唐書

賈島字浪僊涿鹿人有詩聲初為浮屠名無本後舉進士初赴京得詩句云鳥宿池邊樹僧推月下門推敲二字未定不覺衝京兆尹乃韓吏部眾擁之以告遂與之交

禹錫詩話

賈誼洛陽人有才名漢文帝召為博士年三十遷中大夫上議以為公卿絳灌等曰洛陽少年紛亂國政黜為長沙王太傅渡湘作吊屈原賦長沙作鵬賦上召見方受釐宣室因問鬼神之事

夜半前席徙梁王太傅

漢書

賈逵從劉歆受左氏春秋門徒獻粟盈倉人謂舌

耕

拾遺記

賈復方戰傷甚漢光武曰失吾名將聞其妻有孕生女耶我男娶之生男耶我女妻之令其不有妻子之憂也

集覽

夏會稽羽音夏后氏之後

夏桀納有施氏女妹喜有寵為脯林酒池男女裸而相逐一鼓而牛飲者三千人妹喜以為樂成湯放於南巢遂滅

史記

夏育古勇力人能生拔牛尾

夏徵舒字南陳大夫夏御叔之子母夏姬鄭穆公之女挾技術老而復少者三九為寡婦春秋已載其八諺云夏姬得道雞皮三少御叔卒陳靈公與其大夫孔寧儀行父通焉皆衷其相服而戲於朝大夫洩冶諫曰公卿宣淫民無效焉二子殺冶公弗禁復與孔儀飲於夏氏出舒自廐射之薨二子奔楚詩有株林之刺楚莊王討賊殺徵舒因縣陳皆賀申叔時使齊歸不賀使讓之對曰猶可辭乎王曰可哉曰徵舒弑君戮之

義也今縣陳貪也夫牽牛以蹊人之田信有罪矣而奪之牛罰之重也王曰反之可乎曰吾儕小人所謂取諸懷而與之也乃復陳為侯反二

子 左宣十年

夏黃公漢書東綺夏用四姓也索隱曰東園公陳留襄邑人姓唐字宣明居園中用里先生河南軹人秦伯之後姓周名術字元道居祿里夏黃公姓崔名廓字少通齊人居夏里綺里季居綺里名季不載其姓隱商山人稱四皓歌曰漠漠南山深谷逶迤燁燁紫芝可以療饑唐虞世遠

吾將焉歸富貴之畏人不如貧賤之肆志逸士傳

漢惠帝為太子仁弱高祖欲廢立之乃卑辭安

車固請其來上置酒太子侍四人從之年皆八

十餘鬚眉皓白衣冠甚偉上怪問之四人前對

姓名上大驚曰吾求公數歲公避我何為從吾

兒遊乎四人曰陛下輕士臣等義不辱今聞太

子仁孝愛士願為太子死者上曰煩公幸幸調

護太子張良傳

夏無且秦始皇侍醫以藥囊提荆軻論功賜金百

鎰荆軻傳

○十六者

○十七養

養山陽羽音養田基之後由基楚大夫善射去柳葉

百步射之百發百中晉楚戰於鄢陵基射之撤

七札再發盡殪晉師乃止

晉呂錡射中楚共王目王與兩矢射錡中項伏

殲一矢復命左傳

楚有猿王使射之猿抱木而號淮南子

蔣樂安商音周公第三子伯齡封蔣以國為氏國在

南海

蔣子文漢末為秣陵尉逐盜歿鍾山吳文帝都建康子文常乘白馬羽扇出入因立廟鍾山封蔣侯名蔣山

秣陵志

嘗助楊大眼走魏鎧旋廟中人馬跡皆泥濕南唐追謚莊皇帝

梁武帝京師大旱求雨於廟十旬不降命載荻

焚廟是日忽雲起如繖雷雨大注宮殿振動帝

懼備法駕謁廟

曹景宗傳

蔣詡前漢人舍前種竹開三徑路惟故人遊焉後

為兖州刺史王莽居攝告病免

韻府

蔣琰為蜀廣相長孔明日社稷之器非百里才遷

尚書令

蜀志

項遼西商音本姬姓項國後以國為氏

項籍字羽初讀書不成曰書足以記名姓學劍不

成曰此一人敵耳當學萬人敵於是習兵書

本傳

秦亂會稽守殷通欲起兵應陳涉羽殺守收吳

中子弟八千人渡江又得陳嬰英布范增眾至

六七萬求得楚王孫心眾立為王王遣沛公入

咸陽羽至攻函谷關會沛公於鴻門屠咸陽殺

子嬰燒宮室掘始皇塚收寶貨美人而東歸自

稱西楚霸王與沛公爭天下後少助食盡圍垓
下夜起飲帳中泣數行下殺虞姬夜潰圍至烏
江自刎漢以王禮葬之魯穀城 通鑑

項伯羽季父沛公先入秦羽欲攻沛公伯夜馳告
張良良固要見公公奉卮酒以告因勸羽為鴻
門之會項莊舞劍欲因擊沛公伯亦舞劍以翼
蔽之羽滅漢立賜姓劉封列侯 通鑑

項斯楊祭酒詩云幾度見君詩畫好及觀標格過
於詩平生不解藏人善到處逢人說項斯 詩話

党馮翊商音

党仁弘唐廣州都督高祖入關有功後歷官受賊

法當死太宗召大臣自責曲赦其罪黜為庶人

党進宋太祖將為太尉驍勇絕人不學文字每擐

甲冑鬚髯皆磔目光閃電望之若神一日党項

番將嘗食畢捫其腹曰吾不負汝左右曰將軍

固不負腹但此腹負將軍耳坡詩曰從來此腹

負將軍 陶穀得党姬掬雪烹茶 互見陶 又党

項部落名

○十八梗

丙與邴同平陽商音齊大夫邴歆之後

丙吉為漢宣帝陳留令有富翁九十取田客女為妾一接而歿後生男長子以父年高非其子爭財數年州郡不能決吉至曰吾聞真人子無影老人子無影又耐寒取同年兒裸試之時初秋此兒獨啼寒並行日中果無影人皆深服之

漢書列傳

張元始年九十七生子無影 風俗通

為丞相出逢鬪歿人不之問逢牛喘則問牛行幾里矣或謂前後失問吉日三公典謂陰陽方春失熱職當憂人歿則京兆尹之職也 漢書列傳

孫崧崧曰君鄉鄭君子

知古今鈞深致遠誠學者

謂東家丘也原曰人各有志

所向不同有登山採玉者有入海求珠者君以僕以鄭為東家丘則君以僕為西家之愚夫耶

崧謝焉 六帖

魯人不識孔子為聖人曰彼東家丘吾知之 家語

景晉陽角音芊姓楚公族之後

景差楚公族大夫與宋玉唐勒事襄王遊高唐作

大言小言風賦作續騷



原件短缺

P10

景丹從漢光武攻王郎有功封櫟陽侯圖雲臺王

莽時中言語科

耿高陽宮音殷時侯國尚書祖乙圮于耿晉大夫趙夙滅之因氏

耿恭漢永平中為戍已校尉次疏勒城匈奴圍之

絕水山十五丈不得水恭仰天嘆曰昔貳師

拔劍刺山飛泉湧出乃整衣向井祝拜泉遂湧

出揚水示虜虜以為神遂退圍

漢忠義傳

耿弇字伯昭耿况之子扶風茂陵人漢光武封好

時侯耿字自中興後大將軍二人將軍九人卿

遷柳州刺史今廟在焉有柳文行於世

柳子温二子長公綽唐河東節度生仲郢為鹽鐵

轉運使郢四子長璞為著作郎次珪為少

卿次璧為諫大夫次玘為御史

次子公權唐憲宗時為翰林學士穆宗問曰卿

書如何是善對曰用筆在心正心正則筆正上

默然知以筆諫兼太子太保生仲憲憲生瑗

柳開字仲塗大名人初慕韓子名肩愈後進士第

宋初為郡守歷常潤等十二州

柳公綽妻韓氏家法嚴肅其子仲郢夜讀以黃連

如源珠璣卷五
熊膽和丸含之

苟河內商音黃帝之後奔苟突國因氏 一派姓敬

避石敬瑭諱去文爲苟去苟爲文

苟變可將五百乘衛侯以其爲吏食人二雞子不

用子思曰二雞子棄于城之將不可使聞於隣

國也 史記

鈕吳興官音一作鈕

鈕因父母喪負土成墳墳前生麻一株合拱冬夏

青周孝帝表其閭擢甘棠令 北史

子雄父喪廬於墓庭槐枯死服終還家槐復榮

魏文帝詔其里爲累德里 北史

尤方臯善識馬伯樂薦於秦穆公使求馬期年反報

曰得之在沙丘公曰何馬曰牝而黃及至牡而

驪公召伯樂讓曰物色不能知何能爲伯樂曰

臯之所觀天機也得其精忘其粗得其內忘其

外用之果良馬也 淮南子

○二十寢

沈吳興官音周文王第十子曄季食采於沈以邑爲

氏今汝南沈亭

沈諸梁字子高食邑於葉僭稱公不知孔子聖人

故問子路子路不對後知乃自責有責沈文
好畫龍天龍聞而下之窺頭於牖曳尾於屋公
愬而遠走非好龍也好似龍也 劉向新序

沈僧照名法朗少事天師後爲山陰令時武陵王
紀爲會稽亭宴集池畔蛙鳴聒耳王曰殊廢絲
竹之音照呪之卽息至晚宴罷曰王歡已闌令

汝恣鳴卽喧聒

野史

沈彬學僊仕南唐爲吏部侍郎其居有一大柳樹
嘗曰吾必葬此旣歿穴之乃古塚有漆燈一盞
壙頭碑文云佳城今已開雖開不葬埋漆燈猶

未滅留待沈彬來

野史

沈約字休文好學聰慧梁武帝受禪爲尚書僕射
移書徐勉曰老病百日帶常移孔以手握臂月
小半分求歸不許卒於官 聞見錄

○二十一感

范高平官音堯劉累之後東周爲唐杜氏宣王滅杜
隰叔奔晉爲士師爲士氏曾孫氏會爲晉卿食
采於范以邑爲氏范武子文子宣子獻子世爲
晉上卿

范蠡楚三戶人也事越王勾踐吳敗越于夫椒棲

于會稽王入臣服犢鼻供樵夫人給水除糞吳王登臺見王與夫人范蠡坐馬糞之傍君臣之禮存夫婦之儀具太宰嚭受賂因諫王欲赦之子胥不從會吳王疾越王請嘗便入賀曰某日愈云云如期而愈王曰仁人也不聽伍員之諫遂赦歸國嘗膽卧薪不忘報吳謂大夫文種曰吳王淫而好色宰嚭佞而曳心乃得苧蘿山鬻薪之女西施鄭旦教習三年使范蠡獻於吳王大媚之荒於酒色怠於政事越伐吳師敗請成將許之蠡曰謀二十年豈一朝之事耶遂進王

憐欲置之甬東

今四明鄞縣

給三百家以没王世可

乎吳王辭曰孤老矣不能臣王遂伏劍吳既滅置酒吳文臺群臣奉觴賀王無喜色蠡知王不惜群臣之歿乃辭去遺書文種曰王長頸鳥喙鷹視狼步可與其患難不可共安樂不去將害子矣種謝病被讒賜屬鏤歿蠡乃變名陶朱公乘扁舟出三江入五湖莫知所終

吳越春秋

范睢魏人從大夫須賈使齊齊聞其辯賜以金酒賈以為私告國事歸告魏相魏齊桂折脅摺齒箠溺廁中睢佯歿鄭安平持出匿之秦謁者王

稽竊載歸國變名張祿秦賢之以爲相封應侯
秦強諸侯來朝須賈至睢弊衣間行至賈館見
賈驚曰范叔固無恙乎乃至一寒如此哉留飲
食賜以裨袍同御至相府睢先報不出門下曰
吾相張君也賈大驚膝行謝罪睢曰汝所以得
不歿者裨袍戀戀有故人心耳乃大會賓客皆
下莖豆待之

史記

范增居巢人年七十餘爲項羽謀臣羽信讒鴻門
舉玉玦不用圍滎陽請急攻弗聽陳平行反間
請骸歸未至彭城疽卒

通鑑

范滂漢桓帝朝爲清詔使攬轡慨然有澄清天下
之志

漢書列傳

范丹字史雲漢桓帝朝爲萊蕪長避黨禍梁沛間
招拾自給或至絕粒間里歌曰甑中生塵范史
雲盆中生魚范萊蕪

范式字巨卿與汝南張劭字元伯友善武與劭曰
後二年某月日當拜尊親至期劭白母爲雞黍
具母曰二年之別千里之約何信之甚對曰巨
卿信士必不違至日果至拜母盡歡仕東漢
爲荊州刺史

後夢訥呼曰巨卿吾欲某日死某日葬子能相
及式馳赴之喪已發柩不肯前母曰元伯有望
耶移時范式素車白馬號泣而來柩乃進孝友傳

范質字文素後唐舉進士漢周禪代隱民間一日
坐茶肆中時有持扇題詩云大暑去酷吏清風
來故人忽一人貌怪陋前揖曰酷吏何止大暑
相公他日當究此弊遂持扇去不見後至一廟
見土木神肖似扇亦在公心異之仕周首定刑

統宋建隆拜相封魯國公

聞異錄

從子杲求奏遷秩作詩曉之宋文鑑

家有雙燕育雛數四其雌爲猫所得雄者別偶
一燕數日雛盡死剖之乃蒺藜子在嗉蓋繼燕
所害也風俗通

范冲字益謙作座右銘十四事詳小學

范仲淹字希文蘇州人父爲臨川掌書記二歲父
亡隨母改適長山朱氏冒朱姓舉進士改本姓
謝啓云志在投秦入境遂稱於張祿名非霸越
乘舟乃效於陶朱名臣實錄

讀書長白山僧寺宋慶曆中參大政於姑蘇買
田數千畝爲義莊以養宗族之貧者嫁娶喪葬

皆給之。嘗戒諸子曰：吾貧時與汝母養吾親，汝母躬執爨而吾親甘旨未嘗充也。今日得厚祿，欲以養親，親不在矣。

倅陳州郡守母病，道士奏章終夜不動，回曰：夫人再有六年方出天門，遇出明年進士春榜，故稽留問狀元名曰姓王二字，名下一字墨塗旁，註高不可辨。既而母愈，明年狀元王拱壽御筆

改爲拱辰

括異錄

守饒有書生上謁，自言饑寒時盛稱歐陽率更，字薦福寺碑直十金，范爲打千本紙墨已其一

年十八歲

夕雷轟其碑

墨客揮犀

知開封遣子堯夫將麥五百斛往姑蘇，還次丹陽，見石曼卿云：三喪欲舉，無與謀者。堯夫以麥金與之二女，未適，又以舟與之，還見公曰：江南見故舊乎？曰：丹陽見石曼卿者，三喪不舉，二女未適，以麥金與之，猶未敷。曰：何不連麥舟與之？曰：與之矣。公曰：善。

言行錄

公謚文正，四子純、祐、純、仁、純、禮、純粹，知慶州。純仁字堯夫，元祐初拜相，謚忠宣公。嘗戒子弟曰：人雖至愚，責人則明；雖有聰明，恕已則昏。

汝曹但以責人之心責已恕已之心恕人不患
不到聖賢地位也

言行錄

范成大號石湖居士石湖在蘇州盤門外西南十
里大湖之派范蠡從此入公宅其間亭館花木
湖山絕勝有石湖集宋隆興中拜中書舍人參
知政事

范喬年二歲祖馨臨終曰恨不見汝成人以所用
硯與之五歲祖母以硯告喬執硯涕泣遂成名
儒

氏族大全

范祖禹字淳父初字夢得生時父夢一丈夫金甲

至寢室曰吾故漢將軍鄧禹也故名宋元豐中
爲翰林學士神宗時爲諫議大夫有通鑑斷論
○一送

宋京兆宮音周武王封微子啓於宋以國爲氏

宋弘漢大司空封宣平侯明帝姑湖陽公主新寡
欲妻弘難斥言帝令公主坐屏後從容問弘曰
富易交貴易妻人情乎弘曰臣聞貧賤之交不
可忘糟糠之妻不下堂帝顧謂主曰事不諧矣

十八占

宋均漢建武中爲九江守郡多虎設陷穿猶多傷

害均曰民害咎在殘吏退奸貪進忠善可去陷
穽其後虎渡河去 漢書

宋明帝善奕棋虞愿諫曰堯以此教丹朱非人主
所好也乃止 南史

宋武帝幼時讀書十行俱下 南史

爲公時九日登項羽戲馬臺相傳以爲故事

女壽陽公主人日卧含章殿簷下梅落額成五

出拂之不去宮人效梅花粧 韻府

宋景文好客會賓於廣廈中外設重幕內列寶炬
百味具備歌舞俳優相繼觀者忘疲但覺更漏

差長席罷乃二宿名曰不曉天 博聞錄

宋處宗得一長鳴雞愛養窓下後作人語與宗談
論極妙由是文學大進 幽真錄

宋璟唐開元中與蘇味道張說源乾曜同日拜相
通鑑

宋之問武后時求爲北門學士不許作明河篇以
自見 文選

武后見洛南門詔從臣賦詩先成者賜錦袍左
史東方虬先成賜之之問輒成詞語華麗奪袍
賜之 唐書 中宗朝爲修文館學士

宋庠字公序安州人幼與弟祁同學有胡僧見之
曰小宋當魁天下公亦不下甲科後庠於書窓
前見群蟻出暴暴雨浮之水中戲編竹渡之後
僧見曰公今丰神頓異如活萬人必當魁甲庠
曰無之思之惟渡螳僧曰是也庠曰一年豈有
二魁後祁果魁庠第二宋章獻皇后曰弟不可
以先兄改庠第一仁宗嘉祐中拜相封莒國公

陰騭書

宋徽宗重和中都城賣青果男子孕而生子豐樂
樓酒保婦朱氏年四十忽生鬚長六七寸命爲

女道士

宋鑑

宋文帝妹山陰公主適何戢謂帝曰陛下後宮數
百妾惟駙馬一人大不均帝爲置左右好首面
者三十人吏部侍郎褚彥回貌美召之獨宿西
上閣主夜就之回不移志主曰公髯如戟何得
無丈夫志回曰不敢首爲亂階

南史

貢廣平宮音端木子貢之後以字爲氏

貢禹爲漢河南令以職事爲府官免冠禹曰一免
安可復冠遂去漢宣帝朝復爲御史大夫

漢書

雍京兆宮音周文王第十三子雍伯之後以國爲氏

雍齒從漢祖定天下及即位封什方侯

通鑑

仲中山宮音高辛氏子仲堪仲熊之後又魯桓公子

慶父子孫號仲孫氏仲虺相湯

仲由字子路嘗曰家貧親老不擇祿而仕昔者由也為親負米於百里之外常食藜藿今親歿南遊於楚後車百乘累廼列鼎雖欲負米其可得乎枯魚啣索幾何不蠹二親之壽忽如過隙悲哉後為衛輒之難結纓而歿衛人醢之

孝子傳

仲杲仕晉為尚書女見釋書有比丘尼乃為尼建

寺氏族大全

○二寘

費江夏羽音商紂幸臣費仲夏禹之後

費長房後漢汝南人為市掾於樓上獨見壺公懸壺肆頭市罷即跳入壺中長房知非常人乃往拜洒掃事饌公受而不謝積久今日暮俱入壺中長房顧家人憂公乃度長房身斷竹令繫舍後家人以其縊葬之隨公入壺但見樓頭五色侍者數十旨酒佳肴共飲畢而去謂長房曰我仙也謫人間當去子能相隨乎樓下有少酒取之為別長房竭力不能勝公笑以一指提上終

日飲不盡乃隨公去至餓虎群獨行不懼又使
 卧空房朽索懸萬斤石於上蟲啣將墜長房亦
 不移公曰可教公糞使食之蟲臭甚心惡之公
 曰子幾得道恨此不成乃辭歸公遺一竹杖令
 長房乘之縮地而歸投杖葛陂化龍而去自謂
 經旬至家已十餘年矣又惠一符曰以此主地
 鬼神常療百病鞭鬼神一旦失符為眾鬼所殺
 神仙傳

費禕事蜀先主嘗使吳孫權曰君有淑德必當股
 肱蜀志

費孝先成都人宋至和中遊青城寓宿老人家壞
 其竹床請償之老人曰子視其下書云某年月
 日造某年月日為費孝先所壞因師事之青城記

羿濟郡羽音

羿有窮國君善射堯時十日並出金爍水沸草木
 皆焦帝命射其九鳥羽墮落淮南子 弑夏王相
 自立又為其相寒浞殺之史記

張衡靈憲云羿得西王母不死藥其妃嫦娥竊
 之欲奔月宮托身為蟾蜍令黃有筮之有曰吉
 翩翩歸妹獨將西行逢天晦芒母驚母恐後旦

大昌乃往

義縱漢武帝時酷吏以鷹鷂爲治爲長安令爲河南

都尉爲定襄守郡中不寒而栗

酷吏傳

○三霹

季渤海徵音陸終子季連之後又魯桓公子季友四世至季文子

季布楚人爲項羽將數窘漢祖羽滅漢千金購布匿者三族布乃髡鉗自賣魯朱家朱知其布也之洛陽見汝陰侯滕公曰布何罪臣各爲其主耳項臣可得盡誅耶且布之賢漢求之急不北

走胡南走越爾以壯士資敵國子胥所以鞭荆平也上始得天下以私怨求一人何示之不廣也滕公言於上赦之召爲郎

漢書

楚人諺曰得黃金百斤不如季布一諾

○四御

豫河東羽音晉豫讓之

豫讓晉大夫知伯之臣趙襄子殺知伯讓欲爲報仇乃詐爲刑人狹七首入襄側左右見欲殺之襄子曰知伯死無後而此人欲爲報仇真義士也吾謹避之後又伏於橋下馬驚獲之請襄子

衣三躍而斬之乃就成 史記

豫且一曰余且因射龍又曰龍且

吳王夜飲於外臣之家伍員曰昔白龍下清冷之淵化為魚豫且射之中目上訴天帝帝曰魚固人所射也且何罪王乃止 說苑

昔宋元君夜夢一人被髮窺阿門曰 屋曲也予為

清江使河伯余且得予夢覺占之曰神龜也君遍召漁者得余且問之曰得白龜圍五尺君曰獻若既至欲殺之欲活之卜之殺吉乃剗之七十二鑽而無遺策仲尼曰神龜能見夢於元君

而不能避余且之網知能七十二鑽而不能避剗腸之患如是則知有所困神有所不及也 莊子

巨昌平羽音

巨無霸生蓬萊東南海濱身長一丈腰十圍輜車不能載三馬不能勝卧則枕鼓食以鐵箸王莽以為壘尉 王莽傳

○五暮

路內黃商音黃帝封支子於潞春秋潞子嬰兒其後也今上黨潞州後去水為路

路温舒漢人牧羊澤中越蒲以書郡守見而悅之

使就學仕至臨淮太守上疏略曰畫地爲獄議
不入刻木爲吏期不對此皆疾吏之風悲痛之
辭也 漢書

顧武陵羽音夏殷時侯國顧伯之後又漢封勾踐孫
顧余侯因氏

顧愷之字長康晉虎頭將軍善丹青通靈變化稱
其三絕桓溫引爲大司馬嘗食蔗自梢至本日
漸入佳境 本傳

顧悅之爲晉尚書右丞與文帝同年而髮白帝問
之對曰松柏之姿經霜充茂蒲柳之質望秋先

凋 帝紀

顧野王吳人七歲讀五經九歲能作文天文地理
卜筮篆隸無所不通撰玉篇及輿地志仕梁爲
黃門侍郎 文章源流

顧况唐人嘗於御溝得一梧葉詩云一入深宮裏
年年不見春波間寫紅葉寄與有情人况取葉
荅詩云花落深宮鶯亦悲上陽宮女斷腸時帝
城不禁東流水葉上題詩寄阿誰 湖山雜錄

傳清河羽音說築于傅岩因氏

傳說有賢德代居人胥靡役築於傅岩之野以供

食商高宗夢上帝賚以良粥曰說遍求得之立為相書曰若金用汝作礪若濟巨川用汝作舟楫若歲大旱用汝作霖雨

書說命

傳喜漢哀帝朝為光祿大夫賜金百斤養病封高

武侯時稱許史丁傳貴戚重侯

乃許廣史恭丁姬生哀帝傳喜通鑑

傳武仲漢章帝時為蘭臺令與班固賈逵共典校

書下筆不能自休

本傳

傳奕唐武德中為太史令上疏除佛法略曰不忠

不孝削髮而揖君親遊手遊食易服以逃租稅

偽起三途謬張六道竊人主之權擅造化之力

青山白雲人

蕭瑀詰之奕曰蕭瑀不生於空桑乃遵無父之

教上亦惡僧尼耗蠹天下命沙汰之

通鑑

嘗病太宗得胡僧能立呪人死復呪而甦驗之

以告奕曰此邪術也邪不能干正使呪臣必不

行呪之不覺頃之其僧立仆遂不復甦

通鑑

嘗醉卧蹶然起曰傳奕青山白雲人也因醉而

歿惜哉

事文類聚

傳霖少與張詠同學詠顯達求霖二十年不得晚

守宛丘霖被褐騎驢扣門大呼曰語尚書青州

傳霖來見詠曰先生昔何隱今何出曰子將去

矣故來報諫曰我亦知之後一月而卒博聞錄
傳堯俞十歲能文宋元祐中拜中書侍郎

○六秦

戴譙國徵音宋戴公之後以謚爲姓

戴德字延君爲漢信都王太傅弟戴聖字次君
以博士論經石渠二人皆授禮記於后倉各刪
書名戴經號大戴小戴之學

戴和漢宣帝時人每得密友焚香告於先祖則書
於簡編曰金蘭簿書越人結交盟曰卿乘輿我
立他日相逢下車揖我步行卿乘馬他日相

逢馬當下玉海

戴馮後漢爲侍中帝朝群臣詔能說經史者更相
詰難不通者奪其席以益能者馮遂坐五十餘

席漢書

戴逵字安道以琴書自娛晉武陵王晞聞其琴而
召之逵對使者破琴曰戴安道不能爲王門伶
人太康中徵不就晉書王子猷雪夜訪之詳王

削襄陽商音晉大夫削得之後

削徹齊之辯士從韓信項王使武涉說信連和三
分天下信謝不從徹說信曰楚漢知勇俱困莫

若兩利存之鼎足而居天與不取反受其咎獸
盡狗烹願孰慮之信再謝徹遂辭去佯狂爲巫
後信被刑始悔不用蒯言漢祖捕徹至問曰若
教淮陰反乎曰然豎子用臣計安得而夷之命
烹之徹曰秦失其鹿天下共逐高材疾足者得
焉且當時臣止知有韓信不知有陛下天下欲
爲陛下者衆力不及耳又可盡烹耶上曰置之
後避武帝諱漢書改爲通通鑑

介河南羽音介之推之後

介之推又作介子推從晉文公重耳出亡歸國賞

從亡者不及子推推與母俱隱綿山文公求之
不得乃焚山推抱樹歿封綿上田以奉祠祀至
期禁煙火民間熟冷食一月人多病漢周舉爲
并州牧遺文吊子推改爲三日民始安清明則
鑽榆取火左僖二十四年

蔡濟陽徵音周文王第十四子叔度封蔡爲蔡叔因
氏

蔡哀侯娶于莘息侯亦娶焉息媯將歸過蔡蔡侯
曰吾姨也止而見之弗賓息侯聞之怒謂楚文
王曰伐我吾求救於蔡而伐之楚敗蔡師以蔡

侯獻舞歸蔡知息讒故 息媯以語楚子遂釋
蔡滅息以息媯歸生堵敖及成王而不言王問
之曰吾一婦人而事二夫縱不能死又奚言楚
子復滅蔡以悅之 左莊十年

蔡墨晉大夫龍見於絳郊魏獻子問之曰少昊之
子曰重曰該曰修曰熙實能金木水使重主木
為勾芒該主金為蓐收修熙主水為玄冥顓頊
之子黎主火為祝融共工之子龍主社為后土
烈山之子柱為稷龍水物也水官棄矣故龍不
生得 左昭二十九年

蔡順王莽末大荒順拾蕞赤黑異器賊見而問之
曰黑者奉母赤者自食賊見其孝與牛蹄一隻
米五斗而放之 漢書

蔡邕字伯喈漢熹平中奏定六經文字鐫碑立太
學 通鑑

董卓之亂避難吳中行聞爨下桐裂曰良材也
請以為琴無餘以焦為尾呼焦尾琴經會稽柯
亭見椽竹有可為籥取而斷兩節間吹之為黃
鍾之音 八傳

董卓辟為祭酒為侍郎史為尚書卓廢以黨死

如流珠璣
卷五
獄中 通鑑

爲人恃才傲世常會賓客聞王柔在門倒屣出迎 本傳

蔡倫有才學言古書契多竹簡中古用練帛倫用樹膚麻頭弊布魚網爲紙今萊陽有漢黃門蔡倫宅宅西有大石曰在焉 博物志

漢和帝朝爲中常侍封隆平侯

蔡襄字君謨宋慶曆有詩名終端明殿學士

蔡京宋徽宗時翰林承旨臺諫陳瓘見其視日不瞬曰區區精神敢抗太陽得志必爲天下患後

爲相弟卞王安石之婿亦執政子孫滿朝以奢侈勸上大興土木起花石綱爲艮岳由是民疲國亂爲金所敗 十八史

蔡琰邕之女六歲知音律邕夜絕琴問之曰第一絃故絕一絃問之曰第四絃邕戲曰偶中耳琰曰昔季札觀風知四國興衰師曠吹律知南風不競由此觀之何得不知乎及笄字文姬適衛仲道爲胡騎所獲在胡二十年生二子曹操與邕有素以金璧贖之及歸辭胡夫及二子作胡笳十八拍略云東風應律暖氣多知是天子兮

布陽和荒胡舞蹈兮共謳歌兩國交歡兮罷兵
戈忽漢使兮稱詔恩遣千金兮贖妾身喜得生
還兮逢聖君嗟別稚子兮會無因十有二拍兮
哀樂均去住兩情兮難具陳不謂殘生兮却得
全歸撫抱胡兒兮泣下沾衣烏得羽翼兮將汝
歸一步一遠兮足難移十有三拍兮絃急調悲
肝腸刺人兮莫我知及歸再嫁屯田都尉董祀
事文類聚

曹操問邕遺書曰亡父積書四千餘篇俱亡止
記四百餘篇具紙筆書草隸不遺一字

祭太原徵音周公第五子封祭稱祭伯後因氏

祭仲鄭大夫專權公患之使其嬖雍糾殺之雍姬
知之謂其母曰父與夫孰親母曰人盡夫也父
一而已惡可比也乃告仲仲殺糾君子曰謀及
婦人宜其死也 左桓十五年

祭遵廉約無私財身為將軍取士皆用儒人每對
酒必雅歌投壺雖在軍旅不忘俎豆常服布衣
衾光武稱之封潁陽侯 本傳

○七隊

魏鉅鹿宮音周文王第十五子封於畢曰畢公高裔

孫畢萬仕晉封魏至絳犇舒代為晉卿後分晉為諸侯以國氏

魏犇謚武子有嬖妾無子犇疾命子顛曰我死必嫁是妾疾亟則曰殺以狗葬及卒顛曰疾病則亂吾從其治也遂嫁之及為將敗秦於輔氏獲杜回顛先見老人結草以抗回回顛躓而就禽夜夢此老見曰余乃婦人之父也子用先人治命余以是報 國語

文侯見反裘負芻者問故曰愛其毛侯曰愚哉皮之不存毛將安付 國語

魏公子無忌封信陵君有驚鳩投入案下一鷓在屋公子縱鳩去鷓逐殺之公子謂鳩避禍歸吾負之乃捕鷓得二百金手按劍曰誰獲罪一鷓獨低首伏罪示而殺之餘皆散去名流天下而士歸焉 國語

魏絳晉悼公任為正卿言和戎有五利謚莊子魏冉秦相封穰侯擅權張祿言而逐之 史記

魏徵隋人為唐太子建成洗馬事太宗貞觀中諫議後為相上疏言貞觀初陛下清靜寡欲愛民如子求士如渴親君子遠小人孜孜治道濟災

恤老邇來遠求珍異肆用人力狎近小人信讒
縱欲勞民興兵漸不克終者十上曰列諸屏間
朝夕觀之仍錄付史官徵卒上曰以銅爲鏡可
整衣冠以人爲鏡可知得失徵亡失一鏡矣親
爲撰碑陪葬昭陵

通鑑

魏伯陽作參同契其說侶解周易其實論作丹之
意

魏野居東郊築草堂盡水竹之勝號草堂居士宋
太宗徵召不就一日方教鶴舞俄有報中使來
抱琴踰垣而走

隱逸傳

魏了翁字華父慶元中進士端平中拜相

魏夫人晉魏舒之女名華存適南陽劉文生二子
米立乃齋別寢三月太極真人降授道法年八
十三漢成帝咸安九年清虛真人王褒與夫人
藥服之白日升天

集仙錄

善書法有流動之勢

衛河東羽音周文王第八子康叔封於衛以國爲氏

衛懿公好鶴有乘軒者後狄人侵衛受甲者曰鶴
實有祿位使戰余不能戰遂亡衛齊桓公攘戎
狄而封之文公徙居楚立大布之衣大帛之冠
元年革車三十乘末年三百乘

左閔二年

衛宣公烝於夷姜生伋為之娶齊女聞其美作新臺河上要之是為宣姜生壽及朔夷姜縊宣姜與朔愬伋於公公令伋之齊使盜先諸莘隘而殺之壽知告伋伋曰君父之命不可逃壽以非其罪盜節以先盜殺之伋至曰壽何罪我之尤也又殺之國人傷之作二子乘舟左桓十六年

衛蒯瞶衛靈公太子母夫人宋南子淫亂幸宋公子朝公以為大夫太子過宋野人歌之曰既定爾婁猪盍歸乎艾假太子耻之歸謂戲陽速曰從吾朝少君顧則殺之三顧弗舉夫人覺之泣

告公曰太子欲殺余太子懼而出奔宋公薨子

輒立蒯歸輒以兵拒父子路死焉左定十四年

衛青微時有相者曰當封侯漢武時七擊匈奴立

大功封長平侯通鑑

衛瓘晉尚書令因醉撫帝座曰此牀可惜謂太子

惠帝也帝悟其言而無如之何晉書

衛介丰神秀異總角乘羊車入市人以為玉人仕

晉為太子洗馬

○八震

晉平陽徵音周武王第三子叔虞封唐唐有晉水故

名國因氏焉

晉獻公烝於齊姜生秦穆夫人太子申生又取戎女生重耳其姊生夷吾又伐驪戎得驪姬生夷齊其姊生卓子驪姬嬖欲立其子言於公公使太子居曲沃重耳居蒲夷吾居屈群公子皆鄙姬謂太子曰君夢齊姜必速祭之既祭歸胙於公公田寘諸宮六日公至毒而獻之公將食姬曰食從外來請試之祭地地墳與犬犬斃與小臣小臣亦斃姬因泣曰城由太子君老矣汝之國也又曰二三子皆知之或謂太子辭君於辨

太子曰我辭姬必有罪君非姬不食吾又不樂

奔新城

曲沃新築城

自縊伐蒲重耳奔狄伐屈夷吾

奔梁公卒夷齊立大夫里克弑之荀息立車子克又弑之息死焉夷吾賂秦穆公納之是爲惠公將殺里克謂曰微子不及此子弑二君與一大夫爲子君者不亦難乎克曰欲加之罪何患無詞遂伏劍死惠公卒子懷公立重耳出亡十九年而反國殺懷公而立是謂文公

左僖九年

晉景公疾夢一大厲被髮搏膺而踴曰殺余孫不義余得請於帝矣公覺召桑田巫巫言如夢公

曰何如對曰不食新矣疾病求醫於秦秦使緩
 為之公又夢疾為二豎子一曰緩良醫也懼傷
 我一曰居育之上膏之下一我何醫至曰不可
 為也在育之上膏之下攻之不可達之不及藥
 不至焉公曰良醫也禮而歸之公欲麥使甸人
 獻之饋召桑田巫視而殺之將食張如廁陷而
 卒有小臣晨夢負公登天及日中負公如廁言
 之遂殺以狗傳曰巫以功術見殺小臣言夢自

初左成十年

晉有石言晉侯問師曠對曰石不能言或憑焉抑

聞作事不時小民怨讟則有非言之物而言

左昭四年

晉明帝數歲時屬長安使來父問曰日與長安孰

近曰長安近曰何謂也只聞人從長安來不聞

從日邊來明日對羣臣復問曰日近父曰何不

同也對曰舉頭見日不見長安父大奇之

晉書

晉惠帝薨東土奏饑荒曰何不食肉糜 在華林

園聞蛙聲問曰此鳴者為官乎為私乎賈胤對

曰在官地為官在私地為私

晉書

晉楚王儉篡位同謀奴卒皆加爵位每會食貂蟬

滿座時人語曰貂不足狗尾續

十七史

慎到韓大夫務刑名之學撰書四十二篇號慎子

隴中山商音晉韓厥支孫仕趙食采於隴以邑為氏

藺相如韓獻子玄孫也為趙上卿趙得楚和氏璧

秦欲以十五城易之欲與恐見欺不與畏秦強

相如奉璧以往秦無意償城給取璧間歸秦賢

之通鑑

秦趙會於澠池秦王請趙主鼓瑟趙主鼓之相

如請秦王擊缶王不肯相如曰五步之內臣以

頸血濺大王矣秦王乃一擊缶相如命書之王

歸以為上卿十八史與廉頗為刎頸交詳廉

舜河東商音

舜帝有虞氏姓姚名重華父頑母嚳弟象耕於歷

山陶於河濱漁於雷澤堯帝聞其賢德欲讓以

天下使九男事之二女女焉攝政二十八年而

堯崩彈五絃之琴歌南風之詩曰南風之薰兮

可以解吾民之愠兮南風之時兮可以阜吾民

之財兮南巡崩於蒼梧葬於九疑山三妃追之

不及至洞庭望九疑而哭淚着竹成斑灰為湘

神湘川記屈原作湘君娥皇也湘夫人女英也娥皇

無子女英生商均三妃癸比生二女曰宵燈燭

光

○九翰

漢東莞羽音

漢文帝欲作露臺召匠計之百金帝曰百金中人

十家之產也何以臺為通鑑

漢武帝微行夜至柏谷投逆旅主人求漿主人曰

有溺耳疑為奸盜聚少年欲攻之主嫗曰吾觀

客非常人貌異必有備不可圖翁不聽嫗乃醉

翁縛之少年皆散嫗殺雞為黍以謝客外傳

帝好神仙降西王母承華殿詳何見河上翁問

道

用事華山見夏后啓母石登崇嵩如聞山呼

萬歲者三武帝紀

封泰山禪梁甫上岱宗金匱玉冊能知人壽修

短帝探策得十八到讀之曰八十壽果八十本紀

未央宮殿前鐘自鳴三日三夜詔問東方朔對

曰銅者土之母子母感而相應山恐有崩移者

故鐘先鳴三日蜀郡果奏山崩方朔傳

上祀甘泉至渭橋有女子浴於水乳長六七尺

帝恠問之女曰帝後第七車知我乃張寬對曰

天星主祭者齋戒不潔則女人星見耆舊傳

鈎弋夫人國色甚愛之為手拳藏闔之戲今人習之

建章宮作承露臺高二十五丈大十圍以銅為之上有仙人掌擎玉盃承雲表露和玉屑飲之可長壽通鑑

漢光武名秀字文叔生於洛陽縣舍是歲縣界嘉禾一莖九穗因名本紀

與隗囂書曰蠅飛不過十步附於驥尾日行千里光武本紀

漢明帝月夜宴羣臣以赤瑛盤進櫻桃與盤同色拂之不覺墜地雜錄

貫上谷商音

貫雲石號酸齋元翰林學士詩文樂章名於時

段京兆徵音鄭武公少子共叔段之後

段干木隱居不仕魏文侯知其賢累召不就聞侯使至踰垣避之文侯過其廬未嘗不下車曰寡人富財干木富義史記

段志玄唐貞觀中衛章武門上夜遣使出玄拒曰軍門不夜開示手詔曰夜不能辨真偽上曰真

將軍也 通鑑

○十諫

晏齊郡宮音齊公族之後

晏桓公生子名嬰字平仲為齊景公相餽脫粟食

不重味妾不衣帛一狐裘三十年豕肩不掩豆

齊氏春秋 二桃殺三士 詳齊

有為晏子御者其妻窺其夫意氣揚揚妻請去

問故曰晏子相齊名顯諸侯其志常自下子為

人僕自以為足是以求去御者自抑晏子怪問

之以實對薦為大夫 齊氏春秋

使楚楚聞其辯欲折之令執一囚過庭王曰何

人曰齊人為盜王曰齊人亦為盜乎晏子曰江

南有橘江北為枳其種則一其名則二為何土

地使之然也在齊不為盜在楚為盜亦土地使

之然也 說苑

晏殊字同叔七歲為童科正字科閣從陳彭年學

後為西京留守天聖中謚元獻 子叔原號小

山有樂府與范仲淹歐陽修等同時

萬扶風商音

萬敬儒三世同居喪親廬墓刺血寫浮屠經斷二

指復生唐宣宗表其家 孝友傳

○十一霰

卞濟陽羽音曹叔振鐸之後食采於卞因氏

卞和楚人得玉璞而獻楚厲王使玉人攻之曰石

也別其左足武王立又獻之玉人曰石也別其

右足文王立乃抱玉而哭淚盡繼之以血王取

而攻之果良玉也封陵陽侯名和氏璧後歸于

秦李斯篆為璽文曰受命于天既壽永昌 韓非子

卞靈晉大寧末領尚書令與王導同受顧命蘇峻

反壺戰歿二子眡盱聞歿赴賊俱戰歿母裴氏

撫二子尸哭曰父為忠臣汝為孝子徵士翟陽

聞之曰子歿於父父歿於君忠孝之道萃于一

門 晉書

○十二嘯

邵博陵商音召公奭與周同姓封於燕後支庶與周

卿士食邑於召為召穆公召伯召昭公後加邑

為邵

邵平秦東陵侯秦亡為布衣種瓜長安東門青門

亦東陵也 漢書

邵雍字堯夫號安樂先生居洛四十年宋神宗熙

寧初以著作郎徵不至卒謚康節著皇極經世擊壤集元皇慶二年詔從祀

至治中與客步天津橋聞杜鵑聲愀然曰洛陽舊無杜鵑今始至矣客曰何謂也曰天下將治地氣自北而南將亂自南而北今南方地氣至矣禽鳥得氣之先故知之微欽時王安石等用事果敗

通鑑

疾病謂司馬溫公曰吾欲觀化一巡如何公曰先生未應至是笑曰死生常事爾大書一詩曰生乎太平世死乎太平世客問年幾何六十有

七歲乃卒 六帖

○十三效

淖齒楚人燕伐齊楚使將兵救齊齊立為相淖齒與燕分齊乃數齊湣王三罪擢王筋懸於廟梁宿昔而死齊大夫王孫賈聚市人殺之 十七史

暴魏郡商音周諸侯暴辛之後

暴勝之天漢中為直指使衣繡衣持斧鉞威振州郡至渤海惟雋不疑謁 不疑傳

到彭城徵音楚令尹屈到之後以字為氏

到沆梁天監中文德殿學士宴華光殿命賦詩沆

為二百字三刻而成拜殿中侍郎 梁史

○十四箇

賀廣平商音姜姓齊公族慶父之後以字為氏漢安帝時慶純為侍中避安帝父諱改為賀

賀德基出逢一婦謂曰君將貴貧乃爾脫白綸巾贈之後為尚書

賀知章字季真清淡風流唐開元中遷禮部侍郎

兼集賢院學士天寶初請為黃冠以宅為千秋

觀賜鏡湖剡川一曲見李白以金龜換酒號四

明狂叟

○十五碼

華武陵角音宋戴公子考心八說食采於華因氏督元

宣亥並為宋卿

華督宋殤公大夫見大夫孔父嘉之妻于路美而

艷督攻孔父殺而娶其妻公怒督懼遂弑公 左桓二年

華陀後漢人曉養性之術作五禽戲一虎二鹿三

熊四猿五鳥亦除疾體有不安起作一禽舞則

汗出疾愈 養性論

○十六蔗

謝陳留商音炎帝之胤周宣王之舅姜申伯封於謝

以邑為氏今汝南有謝成詩疊疊申伯于邑于

謝

謝尚仕晉為鎮西將軍鎮平渚秋夜乘月泛江會

袁宏舟尚迎之談論達旦由是知名本傳能作

鸚鵡舞

謝眺字玄暉晉為尚書郎文章清麗登三山有澄

江淨如練之句

謝安字安石少有重名桓溫辟為司馬不就寓會

稽以山水書籍自娛高松等譏之曰安石高卧

東山將如蒼生何蒼生亦將如卿何晉大元中

堅

錄尚書事符堅率兵百萬以攻淮安命駕出別墅

與張玄圍碁自若既破取書至安方碁了無喜

色碁畢入戶限喜甚不覺屐齒之折本傳

好登山常着木屐上山則去前齒下山則去後

齒

嘗冬日内集男女列次俄然而雪下安曰白雪紛

紛何所侶兄子朗曰撒塩空中差可擬兄女道

韞曰未若柳絮因風起八人大悅後加大保卒謚

文靖公

謝靈運嘗為永嘉守夢弟市心連忽得池塘生春草

之句以為神助 古今詩話

謝小娥段居貞之妻居貞與謝父同賈為盜申蘭

申春所殺小娥詭服為男子託傭申家因群盜

飲酒蘭春醉卧娥閉戶執蘭首大呼捕賊鄉人

擒春得贓鉅萬娥乃祝髮為尼 氏族大全

謝道韞適王凝之凝弟獻之與客談辭理將屈乃

與小郎解圍

○十七漾

向河南宮音宋桓子向父眇向孫向成之曾孫司馬

向雉也

向秀字子明好老莊嵇康被誅秀入洛聞笛聲療

亮追思嵇康作思舊賦仕晉為散騎常侍 晉書

○十八敬

孟平陸羽音魯桓公子慶父之後號孟孫因氏

孟子名軻字子輿鄒人也孟孫之後蚤喪父母仇

氏三遷至學宮之旁集俎豆之事長師子思遊

齊梁之間道不行與弟子公孫丑萬章之徒述

仲尼之意作孟子七篇 趙岐序

游學未成而歸母引刀趨機曰子之廢學猶吾

之斷斯織也孟子懼而復學遂成大儒 列女傳

孟子新娶婦一日入室婦袒於內軻不悅婦求去母召軻責之曰禮將上堂聲必揚所以戒人也將入戶視必下恐見人過也今子責善不亦遠乎軻乃留婦人曰孟母知禮列女傳

孟說秦力人也與光武舉鼎王絕脉歿

孟賁古勇士也

孟嘗會稽人前漢爲合浦令海出珠先守貪求無極珠漸徙於交趾嘗至革前弊逾年珠復還博物志

孟敏字叔達後漢蜀人嘗負瓦甑而行誤墮之不回顧而去郭林宗見而怪問之荅曰甑已破矣

視之何益言行錄

孟宗字子恭母疾冬月思筍宗抱竹泣而求之忽生筍數莖母食之愈孝子傳

仕吳爲鹽池司馬作魚鮓寄母母曰爾爲鹽官而寄魚鮓非避嫌乎乃反之吳志

孟嘉爲晉桓溫參軍九日溫宴龍山寮佐畢集風吹嘉帽落而不覺溫使左右勿言命孫晟作文嘲之嘉荅文如響尤加美麗晉書

孟後主昶知祥子主蜀於成都城上盛種芙蓉因名錦官城成都志

頒令箴於諸邑其文曰朕念赤子盱食宵衣言之令長撫養惠綏政存三異道主七絲驅雞爲理留犢爲規寬猛得所風俗可移無令侵削無使瘡痍下民易虐上天難欺賦與是功軍國所資朕之賞罰固不踰時爾俸爾祿民膏民脂爲民父母莫不仁慈勉爾爲戒體朕深思凡二十四句蜀志宋太宗摘其十六字頒行天下紹興間復以黃廷堅書命州縣長史刻石至今存焉孟郊字東野湖州人貧居苦吟韓愈詩低頭拜東野年五十第進士調溧陽尉卒謚貞曜

孟浩然襄陽人少好節義遊京師王維邀入禁署玄宗忽至匿牀下維以實聞召問所作再拜自誦至不才明主棄之句上曰卿不求仕朕未嘗棄卿柰何誣我由是失意高士傳性愛梅嘗乘驢踏雪尋之

孟簡唐元和中尚書韓愈與書略曰潮州有一老僧號大顛頗聰明識道理實能外形骸以理自勝地無可與言者故自山召至州因與往來留衣爲別此乃人之情非崇信其法求福田也有人傳愈少信奉釋氏此妄也韓文

孟光字德耀有賢德壯肥而黑力舉石曰年三十
擇壻不嫁父母問故曰欲得賢如梁伯鸞者鴻
聞而娶之及嫁裝飾入門七日而鴻不答光跪
曰式觀夫子之志妾自有隱居之服乃以荆釵
布裙鴻曰此真梁鴻妻也鴻家貧賃舂臯伯通
廡下每饋食舉案齊眉後與鴻俱隱齊魯之間
列女傳

盛汝南羽音周盛國之後

盛彥晉人專母孝母失明婦以蟻螬炙與母食母
密藏示子彥抱母大慟目豁然自明 孝子傳

鄭榮陽徵音周厲王少子友封鄭為鄭桓公以國氏
今華州鄭縣

鄭靈公命膳夫解黿公子宋公子家見而笑公問
之子家曰子公食指動必嘗異味故笑及食大
夫召而弗與子公怒染指於鼎而出公怒欲殺
之二子乃弑公 左宣元年

鄭武公娶武姜生莊公及其叔段莊公寤生驚姜
氏惡之愛叔段欲立之公弗許公薨莊公立姜
為叔段請居京謂之京城大叔叔大其京至於
廩延公子呂曰國不堪二公曰不義不暱厚將

崩叔具卒乘繕甲兵將襲鄭夫人啓之公命子
封伐京叔奔鄆伐鄆奔共寘姜氏於城穎誓曰
不及黃泉無相見也旣而悔之穎谷封人考叔
聞而有獻於公公賜食食舍肉公問之曰請遺
母公曰爾有母遺繫我獨無曰何謂也告而且
悔對曰若掘地及泉隧而相見其誰曰不然如
之賦而出母子如初君子曰穎考叔純孝也愛
其母施及莊公詩曰孝子不匱永錫爾類是之
謂乎

左隱元年

鄭人有薪於椘者遇駭鹿擊斃之藏諸隍中覆以

蕉樵返遺其處遂以爲夢順塗詠其事傍有聞
之者循其言而得之歸告其妻曰薪者得鹿失
其所以爲夢吾得之彼亦真夢矣妻曰吾據得
鹿何用知彼夢我夢耶薪者歸真夢藏鹿之所
又夢所得之人訟而爭之士師曰若初真得鹿
妄謂之夢真夢得夢妄謂之實據有此鹿請二
分之以聞鄭君君曰嘻士師將復夢分人鹿耶
故曰知夢者唯黃帝孔立

列子

鄭子臧鄭文公子僖公也出奔宋好聚鷓冠鄭伯
惡之使盜殺之君子曰服之不衷身之災也

鄭子真名朴前漢人耕隱於谷口名動京師大將

軍王鳳禮聘不屈

揚子逸七傳

鄭莊字當時漢景帝朝太子舍人武帝朝大司農
置驛馬請客皆長安名士戒門下但客至無貴

賤兼留客進者惟恐後

豪俠傳

鄭崇漢哀帝朝尚書僕射數進諫每曳革履上殿

上笑曰我識鄭尚書革履聲其愛敬如此

本傳

鄭衆漢永平初以明經爲給事中使匈奴不拜單
于怒欲協服之拔刀自誓上言臣誠不忍持節
拜羶裘和帝封勳卿侯宦者封侯自此始

通鑑

鄭均任城人漢建初中徵拜尚書以病告歸帝東

巡幸其家賜尚書祿以終其身時號白衣尚書

鄭弘會稽山陰人徵時採薪白鶴山得一遺箭頃

有人覓弘還之問所欲弘曰常患若耶溪載薪

爲難得且南風莫北風爲可至今爲然

異聞錄

漢元和中拜太尉 宣帝時亦有鄭弘爲南陽

守民爲思之

鄭玄字康成從馬融質疑三年東歸融曰吾道東

矣國相孔融禮敬之告高密縣爲玄特立一鄉

曰鄭公鄉

本傳

嘗夢孔子曰起起今年歲在辰明年歲在巳既

寤合讖曰歲在龍蛇賢人嗟知命將終矣夢書

鄭慤三伏內集賓寮取大荷葉莖如象鼻者刺與

柄通盛酒傳吸之取其清香名碧筒雞距傳

鄭谷少敏慧司空圖見而奇之曰一代風騷主僧

齊已携早梅詩謁谷改數枝為一枝已不覺下

拜以為一字師古今詩話

鄭仁本晉太和初與王秀才遊嵩山迷路見一人

眠熟呼之其人枕襪而坐曰君知月乃七寶合

成半月勢如丸其景則日爍其凹處也常有人

萬三千戶修之予亦一數因開襪有玉斧鑿數

事玉屑飯兩裹授二人曰食此雖不足長生可

一生無疾乃指支徑自此合大道矣言訖不見

西陽雜俎

鄭善果母崔氏賢明果為魯郡守母嘗坐閣後聽

果決事有不可輒責之所在有政蹟

鄭交甫適楚過漢江遇江妃二女不知其神皆麗

服佩明珠大如雞卵交甫悅而求之二女解與

甫去數十步二女忽不見佩亦失去列仙傳

鄭虔微時好書苦無紙嘗於慈恩寺貯柿葉數屋

日寫隸書歲久殆遍唐玄宗置廣文館虔為博士畫詩字稱為三絕唐書杜甫有贈歌

嘗謂柿有七德一壽二多陰三無鳥巢四不生蟲五霜葉可愛六嘉實七落葉肥大可書韻府

鄭綮能詩嘗曰詩思在風雪中灞橋驢背上詩話

唐乾寧中拜相

甯齊郡徵音衛康叔之後至武公生季亶食采於甯以邑為氏

甯戚不遇托迹飯牛候齊桓公夜出乘牛扣角而高歌曰南山矸白石爛中有鯉魚長尺半生不

逢堯與舜禪短布單衣適至骭從昏飯牛薄夜半長夜漫漫何時旦公召之與語悅之以為相三齊記

甯成漢酷吏也武帝拜為都尉人曰寧見乳虎勿見甯成怒酷吏傳

鄧南陽徵音殷時鄧侯吾離曼之國以國氏

鄧通漢文帝時以擢舩為黃帽郎帝嘗夢欲上天有黃帽郎推之衣後有穿覺察之似通命為郎欲貴之相者曰當餓死帝曰富貴在朕乃賜蜀道銅山令自鑄後景帝時人告通餓死獄中玉管

鄧禹漢更始時光武持節河北禹起兵渡河追及
鄴見光武曰禹願效尺寸垂功名竹帛耳光武
卽位拜大司徒光武本紀

鄧攸字伯道晉永嘉末沒於石勒率弟子綏及已
子度不能兩全謂其妻曰吾弟蚤亡惟有一息
寧棄我兒妻從之明日子及之繫樹而去後無
子綏服攸喪三年時人語曰天道無知使鄧伯
道無兒本傳贊曰絕子奔走豈慈父之心哉
後爲吳郡守載米之郡祿無所授惟飲吳水後
官代任民數千挽之船不得進乃夜半發吳人

歌曰打五鼓天欲曙鄧侯挽不住謝侯推不去
事文類聚

○十九宥

富齊郡周大夫富辰之後

富弼宋慶曆中資政殿學士封鄭公留守西京府
園牡丹盛開問邵堯夫曰此花幾時開盡曰盡
來日午時明日乃會客驗其言飲畢無恙須臾
羣馬風逸蹄嚙花叢盡毀西京雜記

寇上國宮音蘇忿生爲周司寇以官氏

寇恂字子翼光武定河內鄧禹曰寇恂文武備足

有牧民禦衆之才爲潁川守從駕南征及平百
姓遮道願借寇君一年上許之封雍奴侯圖雲

臺本傳

寇準字平仲華州人八歲吟華山云只有天在上
更無山與齊詠秋風亭野水無人渡孤舟盡日

橫詩話

宋太宗初試仕巴東令後爲相參政丁謂事之
甚謹嘗食沾鬚謂起拂之準笑曰參政國大臣
乃爲官長拂鬚耶謂銜之後因事當貶時丁謂
馮拯同在中書擬崖州以涉鯨波爲艱乃貶雷

州司戶道出公安剪竹插神祠曰準若無負朝
廷枯竹再生乃復活名臣傳後卒喪還公安民

人迎祭斬竹插地掛紙竹皆生邦人號相公竹

巴東志

仁宗封萊公後丁謂亦爲事貶雷州

時人語曰傳與雷州寇司戶人生何處不相逢

鬪江東徵音

鬪伯比楚若敖娶子邲生伯比敖卒從母畜於邲
淫於邲子之女生子邲夫人使棄諸夢澤虎乳
之邲子田見之懼而歸夫人以告使收之以女
妻之楚謂乳爲穀虎爲於菟命曰鬪穀於菟後

為楚令尹字子文

左宣四年

竇扶風徵音夏王相遭有窮之難后方娠出自竇後生少康因氏

竇建德隋末據夏為王救亂臣王世充唐秦王戮

而獻俘大廟

通鑑

竇均禹五子皆穎悟顯達長儀字可象宋太祖朝

自翰林遷端明殿學士次儼字望之自左拾遺

遷禮部次侃為起居郎次偁字日彰太宗參大

政次僖為右補闕馮道詩云燕山竇十郎教子

有義方靈椿一株老丹桂五枝芳

一統志

繆蘭陵羽音與穆姓同秦繆公之後

繆瑀工詩劉後村詩話云余筮仕江西有繆瑜袖

詩來謁調官一聯云有客去遊丞相宅無人來

問孝廉船有崆峒集行于世後為進賢令

嫪毐秦相呂不韋舍人不韋先獻美姬於莊襄王有

娠立為后封不韋為相大期生政王薨政立封

不韋文信侯仍與后通恐事覺以嫪毐詐為宦

者進之與后生二子稱仲父毒醉罵曰王之假

父人告王命鞠之懼而以兵叛敗而車裂之囊

撲殺二子遷太后於雍茅焦諫后復歸

通鑑

茂弘夜夢一人曰以五百錢買汝長子許之後掘錢

一害長子暴死 幽冥錄

○二十沁

○二十一勤

啖助字叔佐唐大曆間考春秋三家缺漏十年乃成

號集傳 儒學傳

○二十二艷

新刻姓源珠璣卷之五

